



SLUŽBENE NOVINE

KANTONA SARAJEVO

Godina XXVII - Broj 29

Četvrtak, 21. 7. 2022. godine
SARAJEVO

ISSN 1512-7052

KANTON SARAJEVO

Vlada Kantona Sarajevo

Na osnovu člana 26. i 28. stav (1) i 31. Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14 - Ispravka), člana 54. stav (2) tačka 2) Zakona o organizaciji organa uprave u Federaciji Bosne i Hercegovine ("Službene novine Federacije BiH", broj 35/05) i člana 11. Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice, pomoći žrtvama i porodicama žrtava genocida nad Bošnjacima zaštićene zone UN "Srebrenica" ("Službene novine Kantona Sarajevo", broj 18/22), Vlada Kantona Sarajevo, na 85. sjednici održanoj 07.07.2022. godine, donijela je

UREDBU

O OSNIVANJU UREDA VLADE KANTONA SARAJEVO ZA PODRŠKU SREBRENICI

Član 1.

(Predmet)

Ovom uredbom osniva se i utvrđuje djelokrug rada i nadležnosti Ureda Vlade Kantona Sarajevo za podršku Srebrenici (u daljnjem tekstu: Ured), kao stručne službe Vlade Kantona Sarajevo (u daljnjem tekstu: Vlada), uređuje rukovođenje Uredom, kao i druga pitanja od značaja za organizovanje i funkcionisanje Ureda.

Član 2.

(Djelokrug rada i nadležnosti)

Ured vrši stručne i administrativno-tehničke poslove, koji se odnose na:

- a) program obnove i rekonstrukcije objekata koji se realizira putem javnog poziva (stambeni/poslovni objekti i drugi objekti u vlasništvu/svlasništvu fizičkih lica iz člana 5. st. (1), (2), (3), (4), (5), (6) i (7) Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice, pomoći žrtvama i porodicama žrtava genocida nad Bošnjacima zaštićene zone UN "Srebrenica" ("Službene novine

Kantona Sarajevo", broj 18/22) (u daljem tekstu: Zakon) koju planira i realizira Ured;

- b) program podrške infrastrukturnim projektima (elektrifikacija, vodovod i putna infrastruktura) u saradnji sa drugim institucijama na državnom, entitetskom i lokalnom nivou području regije istočna Bosna;
- c) program podrške obrazovanju i radnom osposobljavanju lica (stipendiranje i sufinansiranje studija, edukacija i osposobljavanja fizičkih lica iz člana 5. st. (1), (2), (3), (4), (5), (6), (7) i (8) Zakona) koju planira i realizira Ured uz konsultacije sa Ministarstvom za odgoj i obrazovanje Kantona Sarajevo i Ministarstvom za nauku, visoko obrazovanje i mlade Kantona Sarajevo;
- d) program podrške istraživačkim projektima o genocidu, povratku i ljudskim pravima (otvoren za fizička lica koja ispunjavaju uslove iz člana 5. st. (1), (2), (3), (4), (5), (6), (7) i (8) Zakona) koju planira i realizira Ured;
- e) program besplatne pravne pomoći putem pravne službe Ureda (dostupan fizičkim licima koja ispunjavaju uslove iz člana 5. st. (1), (2), (3), (4), (5), (6), (7) i (8) Zakona i pravnim licima u kojima imaju suvlasništvo od najmanje 25% lica koje ispunjava jedan od navedenih uslova, a koja su registrovana na području regije istočna Bosna) koja će obuhvatiti zaštitu prava pred domaćim i međunarodnim sudovima se odnosi i na ostvarivanje prava i savjetovanje pri sastavljanju podnesaka, žalbi, zahtjeva i drugih pravnih akata koje upućuju jedinicama lokalne samouprave i drugim institucijama uprave i organima Bosne i Hercegovine, entiteta Federacija BiH i Republika Srpska;
- f) program podrške investicijama na području jedinice lokalne samouprave Srebrenica (dostupan za privredna društva, obrte, zadruge i gazdinstva sa

- sjedištem ili registrovanom filijalom na području regije istočna Bosna) koju planira i realizira Ured;
- g) program podrške kulturnim, umjetničkim i sportskim projektima na području jedinice lokalne samouprave Srebrenica putem javnog poziva (dostupan za prijavu fizičkim i pravnim licima sa područja Kantona Sarajevo ili sa područja jedinice lokalne samouprave Srebrenica) koju planira i realizira Ured;
 - h) program mobilnosti visokokvalifikovane radne snage na području jedinice lokalne samouprave Srebrenica putem javnog poziva (stipendiranje/finansiranje privremenog ili trajnog boravka visokokvalifikovanih lica za rad i doprinos zajednici u Srebrenici dostupan za prijavu fizičkim licima-državljanima BiH po ispunjavanju uslova iz člana 5. stav (8) Zakona) koju planira i realizira Ured;
 - i) godišnji grant Memorijalnom centru Srebrenica-Potočari Spomen obilježje i mezarje za žrtve genocida iz 1995. godine za istraživačke i razvojne aktivnosti;
 - j) program podrške udruženjima građana i fondacijama za aktivnosti održivog povratka, zaštite ljudskih prava i drugih aktivnosti vezanih za borbu protiv diskriminacije, govora mržnje, građanskog organizovanja na području jedinice lokalne samouprave Srebrenica putem javnog poziva (dostupan za prijavu udruženjima građana i fondacijama sa područja Kantona Sarajevo i sa područja jedinice lokalne samouprave Srebrenica) koju planira i realizira Ured;
 - k) program učešća u subvencioniranju organizacije javnog prijevoza na području jedinice lokalne samouprave Srebrenica, prijevoza djece i đaka osnovnih i srednjih škola na području regije istočna Bosna, redovnog autobusnog saobraćaja na liniji Srebrenica-Sarajevo-Srebrenica koju planira i realizira Ured na osnovu javnog poziva, koji je otvoren za sva privredna društva koja ispunjavaju uslove za provedbu aktivnosti ove vrste transporta putnika;
 - l) program podrške roditeljima i djeci kroz posebno aktivnosti podrške po rođenju djeteta, redovne podrške roditeljima sa troje i više djece do punoljetstva, nabavku školske opreme i drugih oblika dodatne asistencije za roditelje koji ispunjavaju uslove iz člana 5. stav (8) Zakona, koju planira i realizira Ured;
 - m) program podrške ostvarivanju zdravstvene zaštite na području Kantona Sarajevo, što uključuje pristup konsultativno-specijalističkoj zaštiti, dijagnostici, banjskom liječenju, što će se refundacijom troškova realizirati Ured po osnovu zahtjeva za lica koja su obuhvaćena članom 5. st. (1), (2), (3), (4), (5), (6), (7) i (8) Zakona, a do potrošnje planiranih sredstava na godišnjem nivou za ove namjene i
 - n) druga pitanja koja se odnose na provođenje Zakona.

Član 3.

(Rukovođenje)

- (1) Uredom rukovodi šef Ureda, kojeg imenuje Vlada u skladu sa zakonom koji se odnosi na imenovanje državnih službenika.
- (2) Šef Ureda ima status rukovodioca Ureda, kao stručne službe koju obrazuje Vlada, a u smislu člana 10. stav (1) tačka a) Zakona o državnoj službi u Kantonu Sarajevo ("Službene novine Kantona Sarajevo", broj 31/16 i 45/19).
- (3) Šef Ureda za svoj rad odgovara Vladi.
- (4) U slučaju spriječenosti ili odsutnosti šefa Ureda, u poslovima rukovođenja Uredom zamjenjuje ga državni službenik kojeg on odredi.

Član 4.

(Unutrašnja organizacija)

- (1) Unutrašnja organizacija Ureda utvrđuje se Pravilnikom o unutrašnjoj organizaciji, u skladu sa Zakonom o državnoj službi u Kantonu Sarajevo ("Službene novine Kantona Sarajevo", broj 31/16 i 45/19) i drugim podzakonskim propisima koji uređuju ovu oblast.
- (2) Pravilnik o unutrašnjoj organizaciji Ureda donosi šef Ureda, uz saglasnost Vlade.
- (3) U roku od 60 dana od imenovanja šefa Ureda, šef Ureda je dužan donijeti pravilnik iz stava (2) ovog člana.

Član 5.

(Sredstva za rad)

Sredstva potrebna za rad Ureda obezbjeđuju se u Budžetu Kantona Sarajevo.

Član 6.

(Rodna neutralnost izraza)

Izrazi koji se koriste u ovoj uredbi, a imaju rodno značenje koriste se neutralno i odnose se jednako na muški i ženski rod.

Član 7.

(Stupanje na snagu)

Ova uredba stupa na snagu narednog dana od dana objavljivanja u "Službenim novinama Kantona Sarajevo".

Broj 02-04-26792-13/22
07. jula 2022. godine
Sarajevo

Premijer
Edin Forto, s. r.